

22 509 sottascripziuns per laschar viver l'urs

WWF ha surdà petiziun «Viva M25» a Mario Cavigelli

■ (anr/fa) Durant in mais ha il WWF ramassà en tut la Svizra stgars 23 000 sottascripziuns e surdà quellas a cusseglier guvernativ Mario Cavigelli. Cun questa petiziun vul il WWF era sustegnair la lavur dals uffizis grischuns. Mardi è l'urs numnà M25 vegnì vis in pèr uras en la Val Müstair avant che svanir puspè en direcziun Italia. «El u era auters urs giuvens arrivann segiramain puspè sin territori svizzer, els tutgan tar nosa natira multifaria e ston perquai vegnir protegids», ha ditg Anita Mazzetta, la manadra da gestiun dal WWF Grischun, mesemna a Cuira a chaschun da la surdada da la petiziun «Viva M25». Per ramassar en tut la Svizra las 22 509 sottascripziuns ha il WWF duvrà mo in mais. Mazzetta ha declerà las finamiras da la petiziun.

«Ina schanza a l'urs e curaschi als uffizis

Il chantun Grischun haja prestà gia blea buna lavur en connex cun ils urs che turnian, ha ella ditg, «cun nosa petiziun vulesse nus dad ina vart dar ina schanza a l'urs M25 e da l'autra far curaschi als uffizis respunsabels da cuntinuar cun questa lavur a favur da la protecziun dals animals da niz e dals cointainers dal rument.» Per ch'els urs vegnian acceptads en las regiuns pertutgadas dovria en divers lieus anc tschertas adattaziuns a la nova situaziun, ha manegia Joanna Schönenberger, ella è experta per urs e manadra dal project dal WWF en connex cun ils urs en Svizra. Las muntaneras stoppian vegnir protegidas da chauns aposta per quel diever, da pasters e da saivs electricas, ha ella tratg endament. Ch'en pli stoppian vegnir protegidas era las chamonas d'avieuls ed installads containers da rument segirs cunter ils urs. «L'urs duess numnadamain tschertgar ses pavel en la cuntrada selvadia e betg en vischnanca», ha ditg l'experta.



Joanna Schönenberger ed Anita Mazzetta han surdà a Mario Cavigelli la petiziun «Viva M25» en in container da rument che urs nun èn capavels d'avrir.

FOTO F. ANDRY

Dus regals al chantun Grischun

Per mussar ch'il WWF reconuschia la lavur dal chantun ha surdà Mazzetta a Mario Cavigelli las stgars 23 000 sottascripziuns en in container segir cunter l'urs. Il cusseglier guvernativ ha empermess ch'els chattian segiramain in lieu adattà per quest container. Schönenberger ha dà ad el in rapport davart las ex-

perientschas ch'ins ha fatg en il Triangul retic, la regiun dals trais pajais Svizra, Austria ed Italia cun il project Ursina: «Questas experientschas ch'ins ha fatg en la Val Müstair, l'Engiadina Bassa, il Vnuost ed il Tirol austriac duessan servir ad autras regiuns che vegnan confruntadas cun ils urs.» Cavigelli ha menziunà ch'el haja survegnì ils ultims diesch dis stgars

24 000 e-mails per gronda part si da l'Italia, da la Svizra e da singuls auters pajais, tuts cun il giavisch da schanegiar a l'urs M25.

«Chattar ina via per la convivenza cun ils animals da rapina»

El haja chapientscha per il giavisch da proteger ils urs ed er ils lufs en chantun,

ha ditg il president da la regenza grischuna: «Igl è però da confruntar ils differents interess, quels da las organisaziuns per la natira, dals purs, dals chatschaders e dal turissem ils ins cun ils auters, ed alura empruvar da chattar ina via che resguarda pli bain pussaivel ils differents interess.»

A ses avis na duessan quests animals betg esser protegids absolutamain e dastgair vegnir sajettads mo sch'els periclitesschan umans. «Nus vulain pudair intervegnir era sch'els stgarpnan memia blers animals», ha accentuà Mario Cavigelli.

«Purs cun sentiments ambivalents»

«L'urs M25 è vegnì vesì mardi per in pèr uras en Val Müstair, alura è el puspè svanì en direcziun da la Valtellina», ha infurmà l'inspectur da chatscha Georg Brosi. I sa tractia tar quest urs d'in urs che saja fitg inquiet, adina en viadi, ha'l cuntinuà, «l'ultim temp è M25 adina puspè stà in pèr dis en Italia per turnar puspè en il Puschlav u uss er en Val Müstair.» La preschientscha da l'urs M25 en il Grischun fa quitads als purs: «El ha gia stgarpà diversas nursas ed era dus asens, perquai sveglia la petiziun per l'urs M25 segiramain sentiments ambivalents tar ils purs», ha ditg Barbara Dönz, la manadra da gestiun da l'Uniun purila grischuna, «l'enclatga per il giavisch dals petiziunaris vegn perquai probablmain ad esser limitada.»